

明紀事本末補編 下

涵芬樓秘  
笈第五集

明朝紀事本末補編卷三

海鹽彭孫貽弼仁氏著

西人封貢

元順帝遁沙漠瓦剌地其後世世長沙漠曰瓦剌可汗在宣德時曰普花有大酋長二曰阿魯台曰脫驢皆元宗室子永樂封阿魯台爲和寧王脫驢爲順寧王二酋死脫驢有子曰也先并有其衆部落強盛普花亦娶也先妹以自固也先終弑普花以自立也先死部落離散普花之後曰小王子住牧西北邊美水草富饒佚樂帳中多珍寶殘元

大內物也小王子雖號君長不能攝諸部其支屬曰土蠻  
世世強大曰虎墩兔憨虎墩兔憨者華言可汗也小王子  
從父曰吉囊曰俺答皆驍桀擁大衆分地牧吉囊駐迤西  
並河套抵關中地肥饒俺答駐迤東自豐州直宣大最貧  
故喜爲抄掠俺答復寘趕兔於薊邊其土馬橫行沙漠矣  
土蠻駐牧東北邊直開原廣寧土确不能富強益東北徙  
駐帳舊遼陽子孫生聚日蕃衍衆可四十萬有八大部皆  
衣皮鬚髮卷磔如蝟毛鬚慙赭然邊人稱爲黃毛皮襖達  
子云吉囊子十人各萬騎俺答亦有十萬餘騎嘉靖己亥  
辛丑連年入山西太原剽殺吏民以萬計吉囊鹵忻代倡

伎縱淫樂髓竭死諸子不相屬分居西北邊套中俺答日益強長子黃台吉臂偏短善用兵衆咸畏服之過於父丙午寇宣府總督翁萬達檄大同總兵周尙文禦却之萬達丁艱去尙文亦卒庚戌入塞薄都城咸寧侯仇鸞議開馬市俺答嗜中國財物互市頗不絕然所易無良馬時時伺隙盜邊仇鸞死罷馬市比歲入遼東殺總兵岳懋殷尙質圍大同總督楊選王忬皆逮繫論死大帥或死或誅十八年間凡十五更置云其精兵戴鐵浮圖馬具鎧長刀大鎧漿冰雪叛人邱當趙全日夜教之火食屋居攻下諸墩堡俺答終不樂屋居而衆亦畏暑故雖闖入而未嘗據之俺

答老而荒于色寵二妾妾各子一人棄其舊妻妾與異居  
予寵妾子各萬騎俺答長疑內有變以故不敢深入俺答  
長子黃台吉日夜扼腕曰老奴有此衆而槁首沙漠可恥  
也俺答孫曰把漢那吉俺答第三子鐵皆台吉之子也幼  
孤俺答故愛之俺答妻尤暱愛之把漢那吉納妾焉而妾  
美俺答奪取之把漢那吉怒把吉有阿爹阿爹胡人曰阿  
力哥亦有怨于俺答因說把漢那吉率妻奴八人竄走入  
塞下請內附是時隆慶四年庚午九月也那吉旣入塞俺  
答妻日下涕泣曳柴以擊俺答頭罵之曰汝不能歸吾孫  
卽中國須要汝頭吾且與之矣宣大總督王崇古巡撫方

逢時飛遞以聞書上閣臣請以那吉易我叛人趙全等學士高拱貽書崇古曰虜酋款塞乃中國機利也索而與之則示弱損威不歸之與殺之亦結釁起恨苟明言易叛執還其愛孫易我數叛人是與夷狄爲市也甚失中國之體矣虜雛來附自當厚撫之豐其供億俾那吉喜過望彼阿力哥者既能噉那吉使來其人良可用負罪老酋當不敢言歸推誠以結之令盡力于我予之一官以佐那吉世受賞賚爲吾屬夷以名號雄沙漠間二酋必悅老酋旣聞吾之厚其親也雖擁兵以來我則嚴兵諭之曰我厚撫汝孫汝弗知德而擁兵以來能無愧耶黃台吉素恨老酋偏愛

其少子也少子之子南來必咎平昔之偏象此雛也不肯  
爲盡力老酋愛其孫必歸之勢必弭耳求順吾姑未許之  
而揚言曰若犯我中國久矣非自致孰信其誠也耶又使  
人閒諷之曰若苟縛趙全等以獻朝廷信汝誠那漢可歸  
矣否則無計也老酋果以獻吾乃與之言曰若果誠信也  
今而後胡越一家吾歸汝孫以娛暮年在我非要挾之求  
在彼戴天恩之大庶乎其可耳崇古旣得虜情驛書上聞  
請假把漢那吉冠帶示優異以繫老酋心下兵部議廷論  
洵洵兵部不敢主其事拱力持之乃上悉如崇古言奉詔  
虜酋慕義來降其授把漢那吉指揮使阿力哥正千戶各

賞大紅紵絲衣一襲鎮臣加意綏養以需後命趙全等則  
喉俺答擁重兵壓宣府索那吉更召黃台吉犯大同十月  
朔黃台吉以二萬騎入平虜堡直逼大同頗有殺鹵大同  
巡撫方逢時遣譯者土忽智入虜營諭黃台吉黃台吉亦  
遣帖木舍來見逢時於城頭逢時犒之諭以把漢那吉所  
在黃台吉拔營出邊去向洪州巡按宣大御史姚繼可劾  
逢時通虜下兵部議兵部奏虜酋執叛乞降之時正撫臣  
臨機設策之日夷情不可盡洩祕計亦難自明但當觀其  
後效果于事無成自難追罪如於國有益便錄其功豈得  
先事預責何以善後乃命逢時供職如故高拱力持于中

衆議既息崇古遣譯人鮑崇德宣諭虜營備述朝廷不殺  
那吉之仁及賞賚爵服之恩厚責俺答召黃台吉入犯之  
罪俺答唯唯崇德更告以趙全等奸逆構亂許以執叛納  
款可歸汝孫俺答大喜屏左右語崇德曰本圖封貢邱富  
趙全等給我當有天下連年用兵不休幸我孫投順天朝  
蒙恩不殺加恩賞賚始知中國有道天朝誠許歸我孫願  
執趙全等以贖罪我今已老天朝封我一王號統攝北邊  
誰敢不服更量給鍋布以爲生永無侵犯長奉職貢矣卽  
遣二夷丁隨崇德入邊崇古備奏其事詔曰虜酋輸誠願  
執送叛人具見恭順其孫准遣還仍賞綵段四表裏布百

正封貢事督撫鎮巡官更詳議以聞十一月旬有三日也  
拱語齎奏者曰那吉是三品官可用緋袍金帶褐蓋朱旗  
以送之傳語俺答那吉是天朝官人好視之毋聽他人言  
凌賤之也十九日俺答縛趙全李自馨猛谷王趙龍劉四  
馬西川呂西川呂小老八人送入邊二十一日督撫承旨  
遣那吉還俺答見孫相持感泣脫胡帽南嚮稽顙而求封  
貢益切崇古以書報拱請斬趙全等于塞上拱語其使曰  
諸叛罪通天當俘獻于朝法司審鞠明正典刑方今忌功  
者多訛言易起若斬之於邊今日殺全明且多言其僞矣  
阿力哥亦當留之恐老酋甘心此人有傷國體待封貢成

遣之往來諭老酋不得加害庶乎可也乃篋輿傳趙全等至都獄成上遣官奏告郊廟臨朝受俘磔於市傳首九邊崇古封貢之疏至下兵部議衆論紛然言官多排崇古兵部奏令崇古更議崇古持前議甚力兵部又覆令九卿科道會議各有異詞拱慮虜使候旨不得久或生變乃令中書官簡閣中所藏成祖封忠順忠勇王故事勅諭資錫故草具存召職方郎至閣持以示廷臣拱乃盡絀衆議大言于朝曰今之紛紛動以宋事講和爲辭不知宋弱虜強宋求虜故爲講和今虜納貢稱臣是臣服之也何謂和又謂虜必渝盟累年內犯直抵郊圻豈封貢致之哉諸臣徒

見事體重大發言相左倘後不諧云已言之以自卸責豈  
爲國忠計哉兵部乃如總督疏議上詔下禮部定封爵封  
俺答爲順義王加昆都力哈黃台吉官都督同知賜獅子  
蟒衣綵幣表裏有差賜之印以相傳勅加指揮千百戶六  
十三員定互市套虜吉能亦款塞乞封貢三邊總督上其  
事請許其封貢不許互市高拱曰三邊宣大一有異同則  
市于此者寇于彼是兩債也兵部奏如俺答例乃勅賜吉  
能官都督同知彩幣段衣其餘指揮千百戶二十一員互  
市如宣大于是俺答率諸酋上表謝恩貢名馬三十銀鞍  
一上嘉其誠順賚以銀幣有差祭告郊廟大賞賚俺答

又擒趙全餘黨趙宗山張哲等二十二人以獻自是邊鄙  
乂安薊宣以抵甘固烟火萬里六十餘年邊氓生息遂長  
不識金革矣俺答死黃台吉嗣虜俗父死妻其後母俺答  
妾克兔哈屯號曰三娘子或曰俺答甥女或曰宣大伎黠  
而媚善騎射俺答死遂配黃台吉黃台吉所奪諸酋婦甚  
多一朝得三娘子盡棄之黃台吉死子褚力克嗣三娘子  
又配之封忠順夫人實操虜權褚力克死應卜失兔嗣三  
娘子已垂白然必虜聚封事乃可成其支屬素囊撓之數  
年丙辰始成婚卜失兔嗣封督撫騰奏敘功科臣駁之曰  
塞外聚虜朝中進爵書之史冊不爲美談乃寢三娘子殊

自慚矐首配孺子頗市塗澤藥物不數年亦死虜因款市  
久皆柔脆卜失兔貌好弱如書生無祖父風威諸部落如  
永邵卜等並驚弱不任金鐵西邊稍休矣套虜吉能窺西  
邊調發頻仍聚兵祭旗聲犯黃裏恫喝以挾賞東路明愛  
台吉吉能妹壻也次女啞不言養于吉能母太虎娘子許  
婚火落赤子麻記台吉太虎娘子死吉能以甥女改壻順  
義王監市頭目爾留拓不能子小拓不能爾留拓不能獸  
帶妻子筵席牛羊就明愛帳成婚火落赤夜遣其子抄胡  
兒把禿兒以二百騎襲之執小拓不能以去明愛台吉將  
三百騎追之報知吉能吉能遣第三子及吸喇麻僧大小

台吉會把禿等共索小拓不能火落赤堅不與爾留拓不能以兵走吉能帳索其子諸酋相持延綏總兵蕭如薰驛書以聞是時土蠻之裔旣僻處東北生聚日益蕃不與封貢互市時雜二十四營中出沒爲遼患其後插漢兒新立爲虎墩兔憨年少嗜酒色已雄視諸夷我三衛屬夷朶顏諸部皆奚契丹種也咸畏服插漢而清人勃起于建州蠶食插漢邊界驅略牛馬亡算天啟元年給事中姚宗文閱視遼陽令監軍王猷以四千金撫賞虎墩兔憨炒花等議以三千人入桃林口朝貢廷臣劾罷王猷遼瀋繼陷西人乘亂鈔掠巡撫王化貞以二萬金撫炒花五大營虎墩八

大營歹青二千人許助兵攻建州建人入廣寧參將祖大壽借煖兔貴英二萬騎却建人于寧遠城北雙樹子化貞恃西人爲援銳言戰以撓廷弼西人卒不至河西盡沒化貞論死遼自寧遠至前屯朶顏三衛地也寧遠迤東至廣寧虎墩炒花宰賽諸部地也朶顏三十六家僉暈太董忽力煖兔貴英他不能索只速讓台吉哈那彥不喇度台吉哈那顏蟒金他不能蘇不的九旦朗素又罕索羅世皆宣薊諸虜也又答喇明暗歐兒計台吉王燒并之屬毋慮數十萬部落不相統一以遼左沒賞額無所出各裹糧蜂屯住口外聲助兵以挾賞總督王象乾久在宣薊三十年晰

虜情虜咸受款虜慙插漢兒昏于酒色皆叔臘毛太主兵  
亦耄不能自強慙之幸臣貴英恰其部曲朗素尤桀驁自  
重不與諸名王狎諸部惟歹青最驍悍建人畏之以黃金  
二百白金數千參貂數駄結昏于歹青煖太之姪亦壻于  
歹青抽叩亦剽疾結拱兔歹青爲黨宰賽住鎮安炒花部  
尤逼建州建州深結之惟哈喇慎三大部自言黃台吉肆  
不世台吉惡建人之吞遼也將召卜火諸大酋以攻建人  
建人多用降人守廣寧已又虞其變也盡遷之海蓋間悉  
易建人爲守初插漢兒部落曰把都投哈喇慎營中駐牧  
哈喇慎死其部老酋滿五素幼爲插漢父老王子義兒撫